



PRESIDÊNCIA DA REPÚBLICA
CASA CIVIL

Exmos Senhores

N. Refª: GCCC/ 11 /IV/I/2019

Lao Hamutuk

Asuntu: **Dekretu Parlamentu Nasional kona-ba Orsamentu Jeral Estadu 2019**

Haree ba nesesidade atu tetu hamutuk Orsamentu Jeral Estadu 2019 iha aspetu polítiku, jurídku no ekonómiku, Sua Exelénsia Prezidente Repúblika Dr. Francisco Guterres Lú Olo enkarrega ha`u konvida Representante ida. husi Lao Hamutuk. atu tuir sorumotu Prezidente Repúblika ho organizasoens sosiedade sivl. iha Palásiu Prezidensiál Nicolau Lobato. iha loron **7 Janeiro 2019**, tuku **14H30**.

Opiniaun ne`ebé hato`o iha sorumotu ne`e sei la vinkula Señor Prezidente ninia desizaun kona-ba OGE 2019.

Termu Referénsia ba sorumotu ne`e hato`o ho karta-konvite ida ne`e.

Kumprimentus ho respeito.

Francisco Maria de Vasconcelos
Xefe Casa Civil

Palásiu Prezidensiál Nicolau Lobato, 4 Janeiro 2019

CASA CIVIL

Termu Referénsia Sorumutu Prezidente Republika ho Entidades Sira

I. Introdusaun

Iha loron 24 Dezembru 2018, Prezidente Repúblika simu Dekretu Parlamentu Nasional, númeru 4/V-Orsamentu Jeral Estadu 2019 hafoin Parlamentu Nasional aprova tiha Orsamentu Jeral Estadu 2019. Hafoin hahú estuda, Prezidente Repúblika haree katak orsamentu ne'e importante tebes ba dezvoltimentu Estadu Timor-Leste no, iha sorin seluk, haree katak orsamentu ne'e boot no oinsá ninia efeitu multiplikativu ba hadia moris povu nian iha tempu badak, médiu no tempu naruk.

Ita-nia orsamentu sei depende makaas liu ba Fundu Minarai no ita tenke hanoin ona oinsá hasa'e rendimentu doméstiku no investimentu la'ós minarai (iha área turismu, peska, no seluk tan). Ita presiza diversifika ita-nia investimentu. Investimentu iha setór produtivu, edukasaun no saúde. Ho lia fuan seluk katak oinsá ita bele garante no hala'o dezvoltimentu sustentável iha futuru.

Tanba ne'e mak Prezidente Repúblika hakarak halo sorumutu ho entidade sira hanesan akadémiku, jurista, ekonomista, sosiedade sivil no mós konfisaun relijioza sira hodi rona opiniaun kona-ba Orsamentu Jeral Estadu 2019, liuliu kona-ba sustentabilidade ekonomia, finanseira hodi halo dezvoltimentu Estadu ba futuru ne'ebé dí'ak liu.

II. Assuntu ne'ebé sei diskute iha enkontru ne'e mak hanesan tuir mai:

- a. Assuntu Polítiku: atu rona opiniaun no diskute ho matenek-nain sira kona-ba oinsá haree polítika dezvoltimentu ba ita-nia rai, iha tinan 16 nia laran.

- b. Asuntu Jurídiku: rona hanoin kona-ba baze legal Lei Fundu Petroliferu, Lei Jestaun Financeira no lei sira seluk hodi hatuur OGE ka fó baze jurídika legal ba OGE.
- c. Asuntu Ekonómiku: atu haree pontu situasaun ohinloron (ita uza osan barak ona husi Fundu Petroliferu no sei kontinua uza liu Rendimentu Sustentável, nia implikasaun oinsá ba futuru Fundu ne'e) no oinsá haree polítika dezvoltimentu ekonomia Timor-Leste ba oin. Polítika financeira oinsá mak bele asegura no garante sustentabilidade.

III. Objétivu

- a. Halo konsulta hodi hetan opiniaun ne'ebé dí'ak hodi dezvoltive Timor-Leste dí'ak liu, iha futuru.
- b. Atu Prezidente Republika bele hetan idéia konstrutiva kona-ba asuntu ne'ebé liga ho OGE 2019 no mós orsamentu sira ne'ebé sei halo iha tinan tuir mai.

IV. Pontus ba diskusaun mak atu rona opiniaun husi entidade sira ne'ebé mensiona iha leten kona-ba:

- a. Polítika dezvoltimentu liuhusi definisaun áreas prioridades ne'e, VIII Governu Konstitusional apresenta ona ba Parlamentu Nasional no hetan aprovasaun ona.
- b. Oinsá dezvoltive setor prioridades, ninia kreximentu no fator multiplikativu.
- c. Oinsá haree aspetu sustentabilidade ekonomia ba futuru
- d. Oinsá dezvoltive aspetu jurídiku atu asegura hasa'e investimentu hodi halo sustentabilidade ba dezvoltimentu.
- e. Oinsá haree ekilíbriu orsamentu hanesan investimentu ho ninia retornu iha futuru no mós sustentabilidade fiskal, iha futuru.

Pontus sira ne'e mensiona iha leten bele tau opiniaun sistemátika ho eskrita hodi nune'e bele sai dokumentasaun ba Prezidénsia Repúblika. Opiniaun, idéias ka sujestaun ne'ebé mak hato'o sei la vinkula Prezidente Repúblika nia desizaun kona-ba OGE 2019.